

MARKATIK KANPORAKOA.—Txominek agertu zidan lehengo batean, aurreko Adabakietan «Euskaraz hautsi zure marka» zeritzan artikuluan ez genituela era hortako guziak sartu. Ez ba. Etorriak eta datozenak, guziak sartzen hasiko bagina, gu geu ere ez gara libratuko, eta libratu ezik kiloka baino aisago toneladaka material bilduko genuke. Hala ere, Txominen ustez, badira iragarkietan bitxikeri nabarmenak, jaso gabe utzi genituenak artean eta horietatik berezienetakoa Bizkaiko Batzar Nagusien bulegoetan jarriak.

Zer jarri zuten Txomini galdetzean, honako hau izan zen erantzuna:

—*Grupo Político de las Juntas Generales*, «Batzar Nagusien Erriketa Taldea». Aurre aurrean.

Manuelen ustez, oso ondo jarria omen:

—*Erriketa* hori Mendaro aldean erabiltzen den *Errieta* (= *reyerta*) hitzetik jaso izango denez eta egungo politikoen-tzat ondo betetzen duelako; beti erriertan ari direnez, «*Errieta Taldea*».

Baina, guk, hori ezin ba sartu euskaraz markak hauste horretan, hori markatik kanporakoa denez.

DONOSTIARRAK KAXKARINAK?—Manuelek aditzera eman digunez, zenbait donostiar kexaz omen dira aurrekoan (*Egan*, 1986, 1-2 zenb., 156 orr.) «Kaxkarinak direla esan ohi dutela» jarri genuelako. Gure aldetik ez da asmo txarrik egon ordea. Beraz, ez dezatela txartzat hartu. Guk ez dugu ezer asmatu. Gustatzen zaien ala ez, hori beste gauza bat da. Agian, «kaxkarinak», «kaskoinak»-en deformazioa ez ote? Denok dakigu garai batean kaskoinik anitz bazela, eta «Donostiarrak kaskoinak» bidezkoa dirudi.